

籌辦夷務始末

卷十一之十二

籌辦夷務始末卷之十一

道光二十年庚子六月辛酉閩浙總督鄧廷楨福建巡撫
吳文鎔奏竊維夷船來至閩洋圖銷鴉片奸民勾通販運
如蟻附羶事非一年害幾徧地仰蒙

宸衷獨斷刻意湔除臣吳文鎔自上年受任閩疆會同各前督臣
嚴加督飭去冬今春始經調任水師提督陳化成金門鎮
總兵竇振彪統率師船開礮攻擊本年二月間臣鄧廷楨
自粵移閩道經漳泉等屬接見水陸提鎮道府告以夷人
之無能為而我師之大可用又沿途訪察奸匪得有主名
到省後面商臣吳文鎔酌定章程派委興泉永道劉耀椿

汀漳龍道李昭美。分投督辦。並咨行水陸提鎮。分別外洋
內港。各專責成。適

欽差尚書祁寓藻侍郎黃爵滋奉

命來閩。查辦海口事件。開陳利病。宣布

德威。在事文武各員。咸曉然於

聖主意旨所向。如除蔓草。不盡不休。或密設巡防。或明陳師旅。羣

情震竦。漸覺奮興。先於三月間。經前署水師提督程恩高

在梅林洋面。攻擊夷船。致斃夷人。由臣鄧廷楨奏奉

恩旨。特予甄敘在案。茲於五月初一日。據興泉永道劉耀椿稟稱

該道因金山銅山交界地方。為夷船來泉要路。於此設伏。

該夷必不限防。隨密飭廈門同知顧教忠捐廉募水勇三百八十名。分配民船十二隻。委令水師提標左營守備楊靖江督帶出洋緝捕。於四月二十一日。駛至穿山洋面。遇有夷船一隻。在彼寄碇。該備出其不意。揮令外委李茂松督飭水勇各船一齊駛近。兵丁拋擲火罐。打入夷船。水勇等亦擲火開槍。連環並擊。夷人受傷無算。落水死者三人。倉猝之間。夷船不及開礮。惟亂擲鐵彈打來。復經該備飭令水勇將夷船後梢用鈎搭住。水勇頭目陳育手執藤牌。首先躍上夷船。隨而登者二十餘人。搶得銅礮一門。礮蓋一箇。夷人執標亂刺。我軍開槍回擊。又中八人。落水而死。

適南風大作。夷人斫斷船纜。乘風駛逃。兵勇恐其去遠。亦即跳入海中。覓水回船。在海面鈎起夷帽一頂。鐵標四枝。並於本船上拾得大小鐵彈四十五箇。維時署銅山營參將陳顯生率師趕至。會合窮追。夷船且拒且逃。駛入深水大洋。我軍始行收回。查點水勇傷斃八人。業經按名卹賞等情。並據將夷帽鐵標銅礮彈子解送前來。經臣等親驗屬實。又於五月初四日。據署銅山營參將陳顯生稟稱。四月二十日。駕帶兵船。在洋督捕。見有夷船一隻。竄至虎嶼洋面。開放杉板小船。內坐夷人數名。似欲上岸。該將隨令各船弁兵迎頭施放槍礮。將杉板擊沈。夷人全行落水。惟

有黑夷二名。泗水近岸。經古雷汛。額外外委郭德長。督兵
拏獲。搃出小刀一把。該將仍復督率舟師。追擊夷船。直至
東南外洋。始行收回等情。並據漳浦縣稟報相同。經臣等
飭同委員。迎提來省。臣鄧廷楨。帶有廣東通事。督飭譯訊。
據供一名爽果。一名暗麻納。又據同供係阿啞西國人。受
雇在暎夷啦吐咀咭咖哇咭船上。充當水手。船上黑白夷
人。四十餘名。船內裝有鴉片。不知箱數。本年四月初間。由
廣東開船。來至福建一路。見有小船駛近夷船。即被師船
開礮攻打。因此船上鴉片。無人來買。後來駛到崇武洋面。
遇有師船二十餘隻。開礮攻打。夷船不敢亂泊。就駛回不

知名洋面寄碇。小夷乘坐杉板。欲行上岸洗衣。即被拏獲等語。又於五月初三日。接據陸路提臣余步雲來函。並興泉永道劉耀椿稟稱。委員署福州協都司周光碧。雇募水勇二百餘名。配駕民船出洋誘捕。於四月二十六夜。在圍頭洋面。截獲通夷匪船一隻。人犯十一名。起獲煙土二千餘兩。現在發縣訊供。已究出施郭施掌二名。係屬通夷匪犯等情。查以上三事。均在旬日之間。似水陸文武各員。皆有軒輊鼓舞之意。自當乘此機緘。益加奮迅。臣等惟有申明賞罰。策勵羣材。同心合力。外攘內偵。以冀稍副

皇上拔本塞源。除惡保民之至意。

硃批所辦認真可嘉。

諭內閣。鄧廷楨等奏。哨船攻擊番船。生擒黑夷。拏獲漢奸一摺。夷匪來至閩洋。圖銷鴉片。奸民勾通販運。隨地蔓延。經鄧廷楨等督飭員弁。分路攻擊。夷人受傷落水無算。生擒黑夷二名。並截獲通夷匪船。人煙並獲。所辦認真可嘉。所有在事文武員弁。著鄧廷楨等擇其尤為出力者。酌保數員。候朕施恩。毋許冒濫。

丁丑。兩廣總督林則徐。廣東巡撫怡良。奏臣等前次附片具奏。啖夷逗留外洋。常懼火船焚燒。並傳聞該國有大號兵船將至。加意嚴防。各緣由。欽奉

硃批。無論虛實。總當不事張皇。嚴密防範。以逸待勞。主客之勢自

判彼何能為也。勉之。欽此。仰見

皇上運籌決勝。洞燭夷情。臣等跪誦服膺。莫名欽感。伏查暎夷近
日來船。所配兵械較多。實仍載運鴉片。探係該國噉啊啦
等處夷埠。聞知內地辦煙嚴緊。銷路日稀。而夷埠新舊煙
土。存積纍纍。不肯輕棄。是以減跌價值。用三桅大船滿載
而來。而奸夷遂藉以揚言恫喝。冀可准其貿易之求。迨見
臣等拒之益堅。不為所動。其到粵之吐嚙嘩論。嚙嚙噎兵
船三隻。並現在續到之咯吧吐兵船一隻。亦祇在外洋往
來游奕。此東彼西。總無定處。日則暗放三板。分運煙土。引
誘奸民。零星賤賣。夜則拋錨寄碇。並招集辦艇環護。支更

瞭望以防我兵火攻。此外別無動靜。誠如

聖諭。實無能為。惟思峻拒喫夷。原為斷絕鴉片。乃奸夷仍私在外

洋售賣。即奸民必販至內地行銷。積弊何日能清。且該夷

詭計百出。竟不憚虧本。以誘愚民。查近日公班大土一箇。

僅賣洋銀五六圓。較之前年秋冬。價減十分之七。並訊據

先後獲到煙犯。供稱有鴉鴨一隻。換得公班土一箇者。並
有買過一二次。即可向夷人賒煙者。在彼總欲愚弄漢奸。

阻撓禁令。實屬可惡之極。臣等於前次燒燬接濟匪船二

十三隻之後。仍嚴飭水陸文武。力拏通夷匪犯。並設法懲

創奸夷。先於四月間。接據新安縣知縣梁星源稟報。會同

營弁在小濠海邊。續燒辦艇四隻。蓬寮五間。又獲夷船上
廚工梁亞次等六名。除與所獲潛買煙土各犯併案審辦
外。一面函商水師提臣關天培。以夷船最畏焚燒。仍惟以
所畏者設法制之。隨經關天培。委令副將李賢。都司馬辰
守備黃琮。盧大鈺。林大光。選帶能事把總潘永蓐。楊雄超。
廖鎮邦。記委盧麟等分帶兵勇四百餘名。暗伏島澳。並多
雇素諳夷語線民。假裝濟夷辦艇。作為內應。仍於各隘口。
分派弁兵防堵。五月初九日。乘夜半月明時候。將大隊火
船移近磨刀外洋。夷船聚泊處所。占住上風。出其不意。火
船闖進焚燒。各線民亦於假裝辦艇內。同時縱火。有吧哩

夷船上身穿白衣喚夷持械跳出。經記委盧麟揮令水勇方亞早等奮力殺斃四人。其餘夷衆連船全行燒燬。各將備督率把總潘永蓁楊雄超等乘夷船亂奔之際將火箭火罐噴筒等物紛紛拋擲。又將載有煙箱之夷船燒燬一隻。另有夷船一隻桅帆著火棄碇駕逃。經夷衆將火撲救。先後延燒大小辨艇十一隻。又燒燬近岸篷寮九座。其衝突竄逃各夷船彼此撞碰叫喊不絕。夷人帶傷跳水燒斃溺斃及被煙毒迷斃者不計其數。我兵並無被害。惟於殺斃吧哩船上夷人時有水勇二名被夷劍斫傷手膀尚不甚重。該將備等於火發後分投截拏逸艇。適有罟船一隻。

慌忙奔竄。當將人船並獲。其船內有煙盒煙槍。及各種煙具。一併起出。又有棄艇逃赴蓬寮。及由蓬寮復逃之犯。亦俱拏獲。計先後獲犯姜亞連等十三名。現在行提嚴審辦理。此次啖夷猝遭焚勦。傷斃已多。而啣嚙噎船上。帶兵之夷官。嘖啐啗。亦在該船病斃。並查悉夷兵吸水受毒。患病者甚衆。似此頻經受創。當亦共知。

天朝重地。非么膺異類。所可玩法偷生。如再抗不回帆。抑別滋奸計。臣等仍惟恪遵。

批諭。不事張皇。明則以逸待勞。倍森嚴而鎮靜。暗則相機而動。期震警其貪頑。一切機謀。密之又密。以仰副。

聖主訓誨諄諄之至意。至暎夷未銷貨物。恐其私行寄頓影射進口。節經臣等會同粵海關監督臣豫堃。逐一嚴查。即他國貨船中稍有形跡可疑者。如咪喇嚙國之必吐噠一船。呂宋國之吻噸一船。因查閱該國船牌貨單。譯出漢文。與現船貨物未盡符合。立即逐出。不准進口。嗣後尤當時加釐剔。務使各國夷人咸知法度嚴明。不敢希圖朦混。以肅海禁而絕詭謀。

硃批所辦可嘉之至。

庚辰。浙江巡撫烏爾恭額奏竊。臣於本年六月初七日酉刻。據甯波府鄞縣知縣舒恭受。以六月初四日辰刻訪有

夷船多隻。在象山洋面游奕。申刻。又聞有大夷船兩隻。小夷船兩隻。從深水洋駛入定海縣洋面。經提臣祝廷彪。帶領將弁。出洋堵禦。並經甯紹台道李紹昉。會同水師。馳赴鎮海口防堵等情。臣以事關重大。必須親往督辦。當於初八日。由省起程。乘夜渡江。於蕭山境內舟次。即接提臣祝廷彪。函稱。定海洋面。有大小夷船二十餘隻游奕。臣不勝焦急。星夜趨行。至初九日未刻。在會稽境內舟次。接准定海鎮臣張朝發來咨。在洋見有大小夾板夷船二十六隻。隨即整頓礮械堵逐。無如夷船行駛如飛。至旗頭洋面。分作兩幫。一幫竄入定港。一幫向西駛去。鎮臣張朝發。即駛

回定港防堵。一面飭令署中軍游擊羅建功會同署定海縣姚懷祥帶領兵役在於城廂內外及口岸礮臺整列隊伍嚴密防範。並函送夷人所遞夷書一紙到臣。又接提臣祝廷彪先後咨函。聞初七日午刻鎮臣張朝發在船與該夷接戰。未能取勝。夷人俱已上岸。約有三四千人圍攻城池。鎮臣已進城保守。提臣祝廷彪以該夷勢甚猖獗。必須大兵方資攻勦。先調署鎮海營參將胡得耀提標右營游擊周士法帶領水師兵三百名前赴定海。隨同鎮臣防護。尚有提標兵五百名預備撥往。現又飛調內地之湖州金華協兵各四百名。嚴州協兵三百名。紹興協及處州衢州。

鎮標兵各八百名。速赴鎮海。以資調撥。再聞夷船最畏火攻。有新任黃巖鎮標中軍游擊林亮光。熟悉火攻之法。現留鎮海聽候差遣。並飭鄞縣鎮海縣各備火攻船四十隻。候用等因。臣閱看夷書。詞甚狂悖。鎮臣張朝發。何以遽准遞收。夷船在洋游奕。既經帶兵防堵。何以任其登岸。均應嚴查奏辦。惟定海縣孤懸海外。被圍甚急。亟須添撥水師馳往援救。方可無虞。而另幫西駛之夷船。難保其不窺伺甯波鎮海。所關甚鉅。尤須加兵嚴防。臣已飛咨提臣祝廷彪。妥為調度。刻速籌辦。至該夷匪多集醜類。猝至定海。其包藏禍心。殊堪髮指。必當痛加勦辦。以張